

⁷Whakangaeore:—Ki etahi 'whakataeore.'

Ki muri iho i tenei rarangi ko tenei, ki te M.235, me T. Turi p.64:—

'Tunui ki te po, ka oho au.'

Tirohia te M.369 e penei ana,

'Tunui ki te po, whitia mai ki te ao na.'

⁸Taku taumata:—Ki te M. 235 'ki tana taumata.'

Kei muri i tena rarangi ko tenei ki te M.235,

'He oti te huri atu ko Kawatapu arangi.'

⁹I koparea:—I tapaea, i kai-taongatia. E kiia ana hoki he huahua te kai a te tangata ra ma tona manu; ahu mai ai nga huahua i Rotorua, hoko ai ki te takapau, ki era ahua taonga.

¹⁰Pohewahewa:—I mahia ki te taha, ki te papa huahua ranei.

156. HE TANGI MO TE HIKO-O-TE-RANGI.

Na Te Hau-korahi (f).

(*Ngati-Raukawa*).

Na Te Taite Te Tomo i whakamarama.

Kei te pukapuka a McGregor (S. 1/35) e kiia ana 'he waiata na tetahi tangata mo tona iwi i ngaro i te mate.' Kaore he whakamarama i te M.131.

E ki ana a Te Taite ki tona rongonui na Te Hau-korahi o Ngati-Raukawa, whaea o Hoani Taipua; he tangi nana mo Te Hiko-o-te-rangi, i tangihia atu i Rangiuru, i Otaki, i te mate-nga ai o Te Hiko ki Maungatautari. He rangatira a Te Hiko no Ngati-Raukawa, no Ngati-Maniapoto, he whanaunga hoki no Te Haukorahi.

Kaore i takoto pai nga kupu ki te S. 1/25. Ko te kaupapa i taia nei ko te M. 131.

(Ref.: M. 131, S. 1/25).

Tera te Kakau,¹ e!

Whakangaro atu ana ia ki te rua, e.

Tu mai, Hiratu² e

Kia aropiri mai ki roto ra, e.

'Whea te iwi ngaro, e.

Ka pau te tautoko³ e te ngutu, e.

Moea ki te po, e,

I konei tonu koe a Te Hiko,⁴ e.

Hoake ki te ao, e,

Ko au anake te tuohu nei, e.

Pukohu horahia, e,

Na runga ana mai o Tarahanga⁵ ra, e.

Kei raro iti iho, e,

Te wa koia ki taku matua, e.

'Ore te hoki mai, e,

Ki au ra ka iri nei, e,

Te kaha o te ngutu, e,

Te mutu noa i te rangi tahi, na.